

Sango - Lounguela Kobela Mbeti ti Nzapa - Healing Scriptures

Exodus 15:26 Lo tene, Tonga na mo ma yanga ti L'Eternel Nzapa ti mo ndjoni, na mo ye ti sala ye so a yeke mbilimbili na le ti Lo, na mo djia me ti mo a ma commandement ti Lo, na mo bata kpingba-ndia ti Lo koue, fade Mbi djia kobela na ndo mo pepe, so Mbi djia na ndo ajo ti Egypte; teti Mbi yeke L'Eternel so A lounguela kobela ti mo.

Deutéronome 7:15 Fade L'Eternel A lounguela kobela koue na tele ti mo; na kobela sioni nde nde ti Egypte so mo hinga, fade Lo djia mbeni oko na ndo mo pepe, mais fade Lo djia kobela so na ndo ajo koue so a ke mo.

Psaume 107:20 Lo to tene ti Lo, na Lo sala si ala ga ndjoni, Na Lo dji ala na ndo so ye a fouti da.

Psaume 146:8 L'Eternel A lounguela le ti aouaziba; L'Eternel A ya na ndouzou ajo so tele ti ala a bâ; L'Eternel A ndoye ajo ti mbilimbili.

Esaïe 35:5 Na la ni ka, fade le ti aouaziba a lounguela, na me ti aouambongui a lounguela nga.

Esaïe 53:5 Mais A kpo Lo teti kengo-ndia ti ani, A mboko tele ti Lo mbanga ti sioye ti ani; na legue ti pika so Lo ouara, ani ouara siriri; na legue ti ka ti Lo, ani ga ndjoni.

Esaïe 58:8 Tonga so fade lumière ti mo a sou tonga na la na ndapelele, na fade mo ga ndjoni fade fade; fade mbilimbili ti mo a goue na gbele mo, na fade gloire ti L'Eternel a bata peko ti mo.

Jérémie 30:17 Teti fade Mbi kiri ndjo tele na mo, na Mbi sala si ka ti mo a mou, L'Eternel A tene; teti ala di iri ti mo jo so ajo a touma lo, ala tene, A yeke Sion so jo oko a ye lo pepe.

Jérémie 33:6 Ba, fade Mbi leke ka ti ala, Mbi sala si ala ga ndjoni, na Mbi lounguela kobela ti ala, na fade Mbi fa na ala siriri na tene-biani so a ouou mingui.

TiMalachie 4:2 Mais teti i so i kpe mbito ti iri ti Mbi, fade La ti mbilimbili a loundou, na ngangou ti lounguela kobela a yeke na gbe ti kpangbi ti Lo; fade i si guigui, i oulou tonga na amelengue ti bagara so a si guigui na da ti ala.

Matthieu 4:23,24 Jésus A tambela na sesse koue ti Galilée, Lo fa nda ti tene na ajo na ya asynagogue ti ala. Lo fa Tene-ndjoni ti royaume, Lo lounguela akobela koue ti ajo ni, na Lo kiri ngangou na ala so tele ti ala a yeke na ngangou pepe. 24 Tene ti Lo a ouou na sesse koue ti Syrie, na ala ga na ajo koue ti kobela na Lo, ala so kobela nde nde a sala ala, ala so tele ti ala a so ala mingui, ala so a yeke na ayingo sioni, ala so kobela ti gbalo a sala ala, na ala so mbague ti tele ti ala a koui. Lo lounguela kobela ti ala.

Matthieu 8:16,17 Tonga na la a koui aoue, ala ga na ajo mingui na Lo, ajo so a yeke na ayingo sioni. Lo touma ayingo sioni so na guigui na legue ti tene ti Lo, na Lo lounguela kobela ti ajo koue so a yeke na kobela. 17 Tonga so, tene so A tene na legue ti Esaïe a ga tâ tene: Lo kamata angangou-pepe ti ani na Lo yo akobela ti ani.

Matthieu 9:35 Jésus A tambela na akota kodro na akete kodro koue, Lo fa nda ti tene na ajo na ya asynagogue ti ala. Lo fa Tene-ndjoni ti royaume, Lo lounguela akobela koue, na Lo kiri ngangou na ajo koue so tele ti ala a yeke na ngangou pepe.

Matthieu 10:1 Jésus A iri adisciple ti Lo balioko na ndoni osse. Lo mou naala ngangou ti touma ayingo sioni na guigui, ti lounguela kobela koue, na ti kiri ngangou na ajo koue so tele ti ala a yeke na ngangou pepe. (Marc 3:14,15)

Matthieu 10:8 I lounguela kobela ti ajo ti kobela, i ya aouakinda, i sala si ajo ti nguiba a ga ndjoni, na i touma ayingo sioni na guigui. A mou ye na i sengue sengue, i mou ye na ajo sengue sengue.

Matthieu 11:5 A sala si aouaziba a ba ndo, aouazin a tambela, ajo ti nguiba a ga ndjoni, aouambongui a ma ndo. A ya aouakinda, na a fa Tene-ndjoni na aouanzinga.

Matthieu 12:15 Mais Jésus A hinga tene so na Lo djia ndo ni so. Ajo mingui mingui a goue na peko ti Lo, na Lo lounguela kobela ti ala koue.

Matthieu 15:30 Na ajo mingui mingui a ga na Lo, ala ga na ajo so a zin na guele ti ala, aouaziba, aouaboubourou, ajo so a zin na ti ti ala, na ambeni jo mingui. Ala djia ala na gbele Lo, na Lo lounguela kobela ti ala.

Matthieu 17:20 Na Lo tene na ala, Teti mabe ti i a yeke kete mingui. Biani, Mbi tene na i, tonga na i yeke na mabe, même kete alingbi na le' ti moutarde, fade i tene na hoto so, Loundou na ndo so, mo goue na ndo ka, na fade hoto ni a goue. Fade ye oko a yeke pepe so i lingbi sala pepe.

Marc 1:34 Lo lounguela kobela nde nde ti ajo mingui, Lo touma ayingo sioni mingui na guigui. Lo djia legue na ayingo sioni so ti sala tene pepe, teti ala hinga Lo.

Marc 3:10 Lo lounguela kobela ti ajo mingui aoue, tonga so ala koue so a yeke na kobela a ga ndoulou na Lo, si ala lingbi ndou Lo.

Marc 6:5,6 Jésus A lingbi sala amiracle ka pepe, gui ti djia maboko ti Lo na ndo ajo oko oko ti kobela, na Lo lounguela kobela ti ala. 6 Na be ti Lo a do tene ti mabe-pepe ti ala. Lo tambela na akodro nde nde, Lo fa nda ti tene.

Marc 6:13 Ala touma ayingo sioni mingui na guigui, ala sa mafouta na ndo ajo mingui ti kobela na ala lounguela kobela ti ala.

Marc 6:55,56 Ajo ni a kpe na akodro nde nde ti sesse ni, ala commencé ti yo ajo ti kobela na ndo agbogbo, ala ga na ala na ndo so ala ma Lo yeke da. 56 Na ndo koue so Lo goue da, tonga na a yeke na ya akete kodro, ouala

akota kodro, ouala ayaka, ala djia ajo ti kobela na ndo so ajo a bongbi da. Ala hounda Lo mingui si ala lingbi ndou gui ye ti pendere ti yanga ti bongo ti Lo, na ala koue so a ndou bongo ni, tele ti ala a ga ndjoni.

Marc 8:23-25 Lo kamata maboko ti ouaziba so, ala si guigui na kodro ni.

Tonga na Jésus A kou soro na le ti lo, na Lo djia maboko ti Lo na ndo lo aoue, Lo hounda jo ni, Mo ba mbeni ye? 24 Lo ya le ti lo, lo tene, Mbi ba ajo. Ala kpa akeke, na ala yeke tambela. 25 Jésus A kiri A djia maboko ti Lo na le ti lo, na lo ba ndo ndjoni. Le ti lo a kiri a ga ndjoni na lo ba ye koue mbilimbili.

Marc 9:29 Lo tene na ala, Yingo ti Mara so a lingbi si guigui qui na legue ti sambela.

Marc 16:17,18 Na fade afâ so a goue na peko ti ala so a ma na be: fade ala touma ayingo sioni na guigui na iri ti Mbi; fade ala sala tene na afini yanga so ala hinga kodjoni pepe; 18 tonga na ala kamata angbo na ti ti ala, na ala gno yolo ti sioni so a lingbi fa' jo, fade aye so a sala sioni na ala pepe; fade ala djia maboko ti ala na ndo ajo ti kobela, na fade kobela ti ala a oue.

Luc 4:18 Yingo ti Seigneur A yeke na ndo Mbi, Teti Lo sa mafouta na li ti Mbi si Mbi fa Tene-ndjoni na a-ouanzinga.

Luc 4:40 Na lakoui, ajo so a yeke na a-ita so kobela nde nde a sala ala, a ga na ala koue na Lo. Lo djia maboko ti Lo na ndo ala oko oko koue, na Lo lounguela kobela ti ala.

Luc 5:15 Mais tene ti Jésus a tambela mingui. Na ajo mingui mingui a bongbi si ala lingbi ma Lo, na si Lo lounguela kobela ti ala.

Luc 5:17-25 Mbeni la Lo yeke fa nda ti tene, na Apharisien na amaître ti ndia a yeke douti na tele ti Lo. Ala loundou na Jérusalem, na akodro koue ti sesse ti Galilée na ti Judée. Na ngangou ti Seigneur a yeke na Lo ti lounguela kobela. 18 Na ba, ajo a ga na mbeni jo na ndo gbogbo, jo so mbague ti tele ti lo a koui. Ala qui legue ti li na ya da ti djia lo na sesse na gbele Jésus. 19 Teti ajo a sî sîngô, ala qui legue gba, tonga so ala ma na ndoda. Ala lounguela ambeni tuile, ala sala si jo so na gbogbo ti lo a jou na popo ti ajo na gbele Jésus. 20 Tonga na Lo ba mabe ti ala, Lo tene, Koli, A pardonné siokpari ti mo aoue. 21 Amaître ti ndia na Apharisien a commencé ti qui be ti ala, ala tene, Jo so A yeke Jo gne si Lo zonga Nzapa. Jo gne a lingbi pardonné siokpari, qui Nzapa pepe? 22 Mais Jésus A hinga guingo be ti ala, na Lo kiri tene na ala, I qui be ti i teti gne. 23 Ye gne a yeke ngangou aho, ti tene, A pardonné siokpari ti mo aoue, ouala ti tene, Loundou, mo tambela. 24 Mais, si i lingbi hinga Melengue Ti Jo A yeke na ngangou na sesse so ti pardonné siokpari --Lo tene na jo so mbague ti tele ti lo a koui, Mbi tene na mo, loundou, mo kamata gbogbo ti mo, mo goue na da ti mo. 25 Fade fade lo loundou na gbele ala, lo kamata

ye so lo yeke lango na ndo ni, lo goue na da ti lo, na lo yeke ya iri ti Nzapa.
Luc 6:17-19 Lo jou na ala, Lo louti na ndo so a yeke kpangbala, na adisciple ti Lo mingui a yeke ka. Ajo mingui mingui a yeke ka nga so a loundou na akodro koue ti sesse ti Judée, kodro ti Jérusalem, na akodro ti sesse ti Tyr na Sidon na tele ti Kota Ngou Ti Ingo. Ala ga ti ma Lo, na ala ga si Lo lounguela kobela ti ala. 18 Ajo so ayingo sioni a sala ala a ga ndjoni. 19 Ajo so a sî sîngô a gui legue ti ndou Lo, teti ngangou a si guigui na tele ti Lo, na a lounguela kobela ti ala koue.

Luc 7:21,22 Na tâ l'heure ni so, Lo lounguela kobela mingui ti ajo so a yeke na kobela, na ti ajo so tele ti ala a so. Lo touma ayingo sioni, na Lo sala si aouaziba a ba ndo. 22 Jésus A kiri tene na adisciple ti Jean, I goue i tene na Jean tene ti aye so i ba, na ti aye so i ma. Aouaziba a ba ndo, aouazin a tambela, ajo ti nguiba a ga ndjoni, aouambongui a ma ndo, A ya aouakinda, na A fa Tene-ndjoni na aouanzinga.

Luc 8:2 Ambeni ouali oko oko a yeke nga, aouali so Lo touma na guigui ayingo sioni so a yeke na ya ti ala, na Lo lounguela kobela ti ala: Marie ti Magdala, lo so ayingo sioni mbassambala a si guigui na ya ti lo,

Luc 9:2 Lo to ala ti fa tene ti royaume ti Nzapa, na ti lounguela kobela ti ajo ti kobela.

Luc 9:11 Mais ajo so a sî sîngô a hinga ndo ni so, na ala goue na peko ti Lo. Lo balao ala ndjoni, Lo fa na ala tene ti royaume ti Nzapa, na Lo lounguela kobela ti ajo so a yeke na kobela.

Luc 13:12 Tonga na Jésus A ba lo, Lo iri lo, Lo tene na lo, Ouali, A lounguela kobela ti mo aoue.

Luc 13:32 Lo tene na ala, I goue, i tene na renard so, Ba, Mbi yeke touma ayingo sioni na guigui na Mbi yeke lounguela kobela la so na kekereke. Na la ota ni, fade Mbi si na ndo so Mbi yeke goue da.

Jean 5:8,14 Jésus A tene na lo, Loundou! Mo kamata gbogbo ti mo, mo tambela. 14 Na peko ni, Jésus A ouara jo so na ya sedou ti Temple, na Lo tene na lo, Ba! fade so tele ti mo a ga ndjoni aoue. Mo sala siokpari mbeni pepe, si ye ti sioni aho a sala mo pepe.

Jean 14:12 Biani, biani, Mbi tene na i, jo so a ma na be na Mbi, fade lo sala akoussala tonga na so Mbi sala. Na fade lo sala akoussala ti kota aho so, teti Mbi goue na Baba.

Koussala ti aBazènguélè 3:6 Mais Pierre a tene, Mbi yeke na argent ouala l'or pepe, mais ye so a yeke na mbi, mbi mou na mo. Na iri ti Jésus-Christ Ti Nazareth, mo loundou mo tambela.

Koussala ti aBazènguélè 5:15,16 Mbanga ti ye so, ajo a yo ajo ti kobela na guigui, ala djia ala na tele ti legue ti kodro na ndo tangue na gbogbo, si tonga na Pierre a ho na tele ti ala, peut-être gbede ti lo a ti na ndo ambeni ti ala. 16 Na ajo mingui ti akodro so a yeke na tele ti Jérusalem a ga nga.

Ala ga na ajo ti kobela, na ala so ayingo sioni a gui ala, na a lounguela kobela ti ala oko oko koue.

Koussala ti aBazènguélé 10:38 I hinga legue so Nzapa A sa Yingo Voulou na ndo Jésus Ti Nazareth na A mou ngangou na Lo. Na i hinga, Lo goue na ndo nde nde ti sala ndjoni, na ti dji ajo koue so djabalo a sala ala na mgbá. Lo sala aye so koue teti Nzapa A yeke na Lo.

Koussala ti aBazènguélé 19:11,12 Nzapa A sala akota miracle na legue ti Paul. 12 Ajo a kamata amouchoir ouala atablier so a ndou tele ti lo, ala goue na ni na ajo ti kobela, na kobela nde nde ti ala a djia ala, na ayingo sioni a si guigui na ya ti ala.

aRomain 8:26 Tonga so nga, Yingo A sala na ani na ndo so ani yeke na ngangou pepe, teti ani hinga pepe legue ti sambela na legue ni. Mais Yingo mveni A voro Nzapa teti ani na bimango so yanga a lingbi tene pepe.

1 Corinte - 1 aCorinthien 12:9 Lo mou na mbeni jo mabe, na legue ti Yingo oko so; Lo mou na mbeni jo matabissi nde nde ti lounguela kobela, na legue ti Yingo oko so;

1 Corinte - 1 aCorinthien 12:28 Na Nzapa A djia ambeni jo na ya église teti koussala nde nde: kodjo ni, abazenguele; osse ni, apropheète; ota ni, amaître; na peko ni, ajo ti sala miracle; na ndani, Lo mou matabissi nde nde ti lounguela kobela, ti sala koussala, ti commandé, na ti sala tene na yanga nde nde.

Philippes - aPhilippien 2:27 Biani, lo yeke na kobela, lo ga ndoulou ti koui, mais Nzapa A sala be-ndjoni na lo; na gui na lo oko pepe, mais na mbi nga, si mbi ouara mbeni voundou pepe na ndo voundou ti mbi.

Jacques 5:14 Mbeni jo na popo ti i a yeke na kobela? A lingbi lo iri a-ancien ti église si ala ga ala sambela teti lo, ala sa mafouta na ndo lo na iri ti Seigneur.

1 Pierre 2:24 Lo mveni A yo siokpari ti ani na tele ti Lo na keke, si ani lingbi koui ti djia siokpari, na ani douti na fini ti sala mbilimbili. Na legue ti ka ti Lo, ani ga ndjoni aoue.

3 Jean 1:2 Mo so mbi ndoye mo mingui, mbi ye ye ti mo koue a ga ndjoni, na ya ye koue. Na mbi ye tele ti mo a douti ndjoni, legueoko tonga na âme ti mo a douti ndjoni.